

Ujio wa Kwanza na wa Pili,

Kadhalika Kristo naye, akiisha kutolewa sadaka mara moja azichukue dhambi za watu wengi; atatokea mara ya pili, pasipo dhambi, kwa hao wamtazamia kwa wokovu. Waebrania 9:28.

Katika ujio wa kwanza wa Kristo... malaika wa mbinguni walishindwa kujizuia kuendelea kumimina sifa zao kuu kutoa heshima kwa tukio la kuzaliwa kwa Mwana wa Mungu... Kuzaliwa kule, ambako maandalizi kidogo sana kwa ajili yake yalifanyika hapa duniani, kulisherhekewa katika nyua za mbinguni kwa sifa na kutoa shukurani kwa niaba ya wanadamu.

Wakati wachungaji wa kondeni huko Bethlehemu walipokuwa wakiangalia makundi yao usiku, "Malaika wa Bwana akawatokea ghafula, utukufu wa Bwana ukawang'aria pande zote"...

Viongozi katika Israeli walidai kuuelewa unabii, lakini walikuwa wamepokea mawazo ya uongo kuhusiana na namna ya ujio wa Kristo. Shetani aliwadanganya; na utukufu wote wa ujio wa Kristo mara ya pili waliuhusisha katika ujio Wake wa kwanza. Matukio yote ya ajabu yanayoambatana na ujio Wake wa pili, waliyatazamia katika ujio wa kwanza. Hivyo, wakati Alipokuja, hawakuwa tayari kumpokea...

Kati ya ujio wa kwanza na wa pili wa Kristo kutaonekana tofauti ya ajabu. Hakuna lugha ya mwanadamu inayoweza kuelezea ujio wa pili wa Mwana wa Adamu katika mawingu ya mbinguni. Atakuja na utukufu Wake na utukufu wa Baba na wa malaika watakatifu. Atakuja akiwa amefunikwa katika vazi la nuru, ambalo amelivaa tangu milele. Malaika wataandamana pamoja Naye. Makumi elfu kwa makumi elfu watamsindikiza ajapo. Sauti ya parapanda itasikika, ikiwaita wale waliolala mauti kutoka makaburini. Sauti ya Kristo itapenya katika kaburi na kuingia katika masikio ya wafu, na "watu wote waliomo makaburini ... nao watatoka" ...

Sasa tupo katikati ya hatari za siku za mwisho. Matukio ya vita yanatokea na ile siku kuu inakaribia. Je, tumejiandaa? Kila tendo, kubwa au dogo, litatambuliwa. Kile ambacho kilichukuliwa kuwa sio cha muhimu hapa kitaonekana halisi. Senti mbili za mjane zitatambuliwa. Kikombe cha maji baridi kilichotolewa, magereza yaliyotembelewa, wenye njaa waliolishwa – kila kimoja kitatolewa thawabu yake...

Kichwa cha nyoka si mbali kitajeruhiwa na kupondwa kabisa. Kumbukumbu adhimu ya nguvu ya ajabu ya Mungu hivi karibuni itarejeshwa katika nafasi yake sahihi. Bustani ya Edeni iliyopotezwa itarejeshwa. Mpango wa Mungu wa wokovu wa mwanadamu utakuwa umekamilika. Mwana wa Adamu atawapa taji ya uzima wa milele watakatifu "nao wanamtumikia mchana na usiku katika hekalu lake, na yeye aketiye katika kiti cha enzi atatanda hema yake juu yao" (Ufunuo 7:15)

(The Review and Herald, Septemba 5, 1899).